

Akunnittarfinni il.il., inini katersuuttarfinni, inini ilinniartitsiviusuni, ulluunerani paaqqinnittarfinni pisiniarfinnilu ikuallattornaveersaartitsinermi iliusissat pillugit Namminersorlutik Oqartussat nalunaarutaat

Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliusissat pillugit Inatsisartut inatsisaanni nr. 14-imi, 26. maj 2010-meersumi § 22, imm. 2, § 29, imm. 2 aamma § 39 naapertorlugit aalajangersarneqarput:

Atuuffi

§ 1. Nalunaarut manna atuuppoq:

- 1) Akunnittarfinnut il.il. sinittarfeqarfilinnut, 10-init amerlanerusunik siniffissaqartitsiviusunut.
- 2) Paaqqutarisarialinnut sullissivinnut sinittarfeqarfilinnut, 10-init amerlanerusunik siniffissaqartitsiviusunut.
- 3) Ininut katersuuttarfinnut inunnut 50-init amerlanerusunut atorineqartunut.
- 4) Ilinniartitsiveqarfinnut inunnut 150-init amerlanerusunut atorineqartunut.
- 5) Ulluunerani paaqqinnittarfeqarfinnut inunnut 50-init amerlanerusunut imaluunniit sinittussanut 10-init amerlanerusunut atorineqartunut.
- 6) Pisiniarfinnut inunnut 150-init amerlanerusunut atorineqartunut.
- 7) Nunaqarfinni aammalu sanaartukkani ataatsimoortuni annikinnerusuni allani, kiisalu asimi biiliniq qatserutiniq seqqitsaaserneqarsimasunik atortuliilluni annaassiniarnissamut upalungaarsimasunik pilersitsiviusimannigitsuni suliffeqarfinnut nr. 1-6-imi taaneqartunut.

§ 2. Piginnittup, atuisup imaluunniit inuup ingerlatsinermit akisussaasuusussatut toqqagaasup suliffeqarfinni sullissivinnilu § 1-imi taaneqartuni ingerlatsinermit peqqussutit malinneqarnissaat isumagissavaa.

Ingerlatsinermi iliusissat

§ 3. Suliffeqarfinnut § 1, nr. 1-2-mi aamma 4-6-imi taaneqartunut, kiisalu ininut katersuuttarfinnut inunnut 150-init amerlanerusunit atorineqartunut ingerlatsinermit peqqussutit nassuiaasersuutillu ilanngussami aalajangersarneqarput, taassumalu sulisunut ilitsersuutitut, torersaarnissamut maleruagassanut,

aqqutitut qimaaffissianut, qatserutitut, ikuallattoornermut matunut il.il. aqgutit qimaaffissiat qaammaqqusersorneqarnerannut, kalerrisaarutitut kiisalu innaallagissap isumannaassusaanut uppernarsaatitut il.il. maleruagassat imarai.

Imm. 2. Suliffeqarfinni taakkunani, pisuni ataasiakkaani ikuallattoornissamut pinaveersaartitsinermi annikillisisiniarnermulluunniit, aammalu inunnik ininiittunik annaassiniarnissap qulakkeernissaanut pisariaqartutut naliliiffigineqartunik, kommunalbestyrelsi ingerlatsinermut annertunerusunik peqqussuteqarsinnaavoq.

§ 4. Initut katersuuttarfinnut, inunnut 50-it sinnerlugit aammalu amerlanerpaamik inunnut 150-inut atorneqarsinnaasunut, pisuni ataasiakkaani ikuallattoornissamut pinaveersaartitsinermi aammalu ikuallattoqalissagaluarpas annaassiniarnerup qatserinerullu isumannaatsumik ingerlannissaanut qulakkeeriniarnermi pisariaqartutut naliliiffigineqartunik, kommunalbestyrelsi ingerlatsinermut tunngasumik peqqussuteqarsinnaavoq.

Imm. 2. Suliffeqarfinnut § 1, nr. 7 naapertorlugu atorneqartunut, sanaartukkat immikkoortuinit ininullu § 1, nr. 1-6 naapertorlugu atorneqartuni, pisuni ataasiakkaani ikuallattoornissamut pinaveersaartitsinermi aammalu ikuallattoqalissagaluarpas annaassiniarnerup qatserinerullu isumannaatsumik ingerlannissaanut qulakkeeriniarnermi pisariaqartutut naliliiffigineqartunik, kommunalbestyrelsi ingerlatsinermut tunngasumik peqqussuteqarsinnaavoq.

§ 5. Illut akunnittarfittut il.il. ilusiligaangitsut kommunalbestyrelsip pisunut ataasiakkaanut tamanut, aammalu atugassarititaasut ingerlatsinermut peqqussutini aalajangersarneqartut tunngavigalugit akuersissuteqarneratigut, ullut unnuallu qulit tikillugit unnuisarfugallartutut atorneqarsinnaapput.

Qinnuteqartarneq nalunaarutiginnittarnerlu

§ 6. Nalunaarut imaluunniit ilanngussami ingerlatsinissamut peqqussutit taaneqartut naapertorlugit akuersissutini akuersissuteqarnissanullu qinnuteqaatinut kiisalu kommunalbestyrelsimut nalunaarutiginninnernut, titartakkar marlunggorlugit ilanngunneqassapput.

Pineqaatissiissut

§ 7. Akiliisussanngortinneqarluni pineqaatissinneqarsinnaavoq

1) ingerlatsinermi peqqussutini, § 3, imm. 1 naapertorlugu aalajangersarneqartunik malinninngitsoq, imaluunniit

2) § 8, imm. 2-5-imik unioqqutitsisoq.

Atuutilerfia il.il.

§ 8. Nalunaarut 1. november 2012-mi atuutilerpoq.

Imm. 2. Akunnittarfiit il.il., paaqqutarisarialinnut sullissiviit, init katersuuttarfiit, init ilinniartitsiviit, ulluunerani paaqqinnittarfiit pisiniarfillu, nalunaarutip atuutilernerata kingorna ilusilersorneqarnissamut, allanngortiterneqarnissamut allannguissamulluunniit akuerineqartut piginnittumit atuisumilluunniit

kommunalbestyrelsimut nalunaarutigineqassapput, aammalu init atorneqalinnginnerini piumasaqaatit, nalunaarut imaluunniit ingerlatsinissamut peqqussutit malillugit kommunalbestyrelsimit piumasarineqartut naammassineqarsimassallutik.

Imm. 3. Akunnittarfiit il.il., paaqqutarisarialinnut sullissiviit, init katersuuttarfiit, init ilinniartitsiviit, ulluunerani paaqqinnittarfiit pisiniarfillu, nalunaarutip atulernissaa sioqqullugu ilusilerneqarnissaminut atorneqalernissaminnullu akuerineqartut, nalunaarutip atuutilernerata kingorna qaammatit pingasut qaangiutinnginnerini piginnittumit kommunalbestyrelsimut nalunaarutigineqassapput.

Imm. 4. Init katersuuttarfiit imm. 2-3-mi taaneqartut kommunalbestyrelsimut nalunaarutigineqarnerini aamma piginnittup imaluunniit atuisup aqqa najugaalu ilisimatitsissutigineqassapput. Ininik katersuuttarfinnik piginnittoq imaluunniit atuisoq inummik ingerlatsinermi akisussaasumik toqqaasimappat, aamma taassuma aqqa najugaalu ilisimatitsissutigineqassaaq. Ilisimatitsissutigineqartunut allannguutit aamma kommunalbestyrelsimut nalunaarutigineqassapput.

Namminersorlutik Oqartussat, ulloq 3. Oktober 2012

Jens B. Frederiksen

/

Steffen Ulrich-Lynge

Ilanngussaq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

